



# STINAPA TA INFORMA

## HISTORIA DI E PARKE SUPMARINO – PARTI 2

E promé añanan di e parke supmarino tabata hopi difísil, mirá for di e punto finansiero. Ya kaba na 1981 a bin ku e idea pa pidi un entrada na tur sambuyadó. Den promé instante a pensa na pidi \$ 5.00. Pero e idea aki a topa ku resistensha. Komo resultado kasi no tabatin plaka pa maneho i mantenshon di e parke. Afortunadamente e sentronan di buseo i boluntarionan a duna un man. Pero tabata opvio ku esaki no tabata e manera pa mantené un parke di naturalesa na un manera profeshonal. STINAPA Nederlandse Antillen i gobièrnu a duna e impulso tan nesario den komienso di añanan 90. Un meta importante tabata pa laga e parke supmarino para riba su propio pia finansieramente. E Ordenansa Medioambiente Marítimo, e lei ku ta duna e parke marino su protekshon legal a ser modernisá na 1991. E idea pa kobra un entrada na e sambuyadónan a ser poné den e lei. For di e momentu ei tur sambuyadó tabata paga \$ 10.00 pa aña pa por sambuyá den e Parke Marino Boneiru. Esaki tabata un punto importantísimo pa e maneho di e parke. I a resultá ku e sambuyadónan no tabata preukupá étól pa paga entrada. Basta ku tabata usa e plaka pa mantenshon di e parke marino. Pa e maneho diario STINAPA a nombra un gerente nobo den persona di Kalli de Meyer i huntu kuné kuater ranger: George Saragoza, Yuvencio Vissers, Edwin Domacasse i Eky Allee. Atrobe Boneiru a marka historia. E kombinashon di protekshon legal, maneho diario i kobramentu di entrada tabata un kos nobo den mundu. Tabatin tur motibu pa Bonerianonan tabata orguyoso di nan parke supmarino. Un aña despues, na 1992, un “komishon di hòmber sabí”, e komishon Pourier, a entregá un rapòrt na gobièrnu tokante e desaroyo sosio-ekonómiko di Boneiru. Den e rapòrt aki e desaroyo duradero di e isla ta sentral. Tabata rekonosé naturalesa i medioambiente komo e produktonan ekonómiko di mas importansha pa e isla. No tin ningun motibu pa Boneiru sigui e ruta ku hopi otro isla den Karibe a skohe. Mester optimalisá e uso di e karakterístikanan úniko di e isla; esta bunitesa di naturalesa, kultura, e eskala chikitu, frankilidat i sentido amikal. E futuro di Boneiru ta turismo duradero, no turismo masal. E éksito di e parke supmarino ta prueba ku Boneiru por skohe su propio kaminda. Ora ku gobièrnu, negoshantenan i organisashonnan di naturalesa ta traha huntu por realisá nos lema: “kresementu ku mantenshon di naturalesa i kultura.” Esei no ta konta solamente pa laman i e parke supmarino, pero tambe pa sobrá di e isla. Pa mas informashon wak : <http://www.bmp.org/history.html>

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALES



**Traha huntu na un desaroyo duradero pa Boneiru**